

09.20 Hrs.

Headlines

- किश्तवाड़ दे चिशौती गां च बददल फट्टने दी कुदरती क्रोपी परैन्त उत्थे फसे दे लोकें गी बचाने लेई बचाऽ ते राहत अभियान होर तेज करी दित्ता गेआ ऐ। मुखमंत्रि ओमर अब्दुल्ला होरें नुक्सान दा आंकलन कीता ते आखेआ जे ओह लोकें दी तकलीफ गी खरी चाल्ली समझी सकदे न।
- केन्द्री मंत्री डाक्टर जीतेन्द्र सिंह होरें आखेआ ऐ जे प्रधानमंत्री नरेन्द्र मोदी होर किश्तवाड़ च जारी बचाऽ सरबन्धी हीलें दी आपूं निगरानी करे करदे न। प्रभावितें गी पक्क गै लोड़चदा मुआवजा दित्ता जाहग।
- जल शक्ति मंत्री जावेद अहमद राणा होरें पुंछ च सुरनकोट ते मेंढर दे ल्हास-पस्सियां पौने करी प्रभावत इलाकें दा दौरा लाइयै, सार्वजनिक ढांचे गी परतियै ब्हाल करने सरबन्धी जतनें दा जायजा लैता।
- एम्स जम्मू नै, आउटलुक मैगज़ीन दी 2025 ब'रे लेई सरकारी मेडिकल युनिवर्सिटिं दी दर्जेबंदी च 7मीं थाह हासल कीती ऐ।
- मौसम विभाग नै औंदी 19 अगस्त तोहड़ी जम्मू-कश्मीर च भारी बरखें ते गरज-चमक कन्नै बरखा बरने दी चेतावनी जारी करदे होई आखेआ ऐ जे केईं थाहें पर चानचक्क हाड़ औने ते ल्हास-पस्सियां पौने दा खतरा बनी सकदा ऐ।

Kishtwar-Cloudburst

किश्तवाड़ जिले दे चशोती ग्रांs च बद्दल फट्टने परैंत इस बेल्लै राहत ते बचाs कम्म जोरें-शेरें कन्नै जारी ऐ। सेना, राश्ट्री आपदा मोचन बल (NDRF), राज्य आपदा मोचन बल (SDRF), पुलस ते स्थानीय प्रशासन सक्रिय रूप कन्नै मौके पर मजूद न। मुखमंत्री उमर अब्दुल्ला होरें जंदे रोज हाड़ प्रभावित चशोती ग्रांs दा दौरा कीता ते बद्दल फट्टने करी आए दे चानचक्क हाड़ कन्नै होए दे नुकसान दा जायजा लैता। अपने दौरै दरान उनें लोकें कन्नै, जिंदे परौआर आहले आपदा दे कारण लापता न, उंदे कन्नै गल्ल कीती ते आखेआ जे उंदा दर्द तक तकलीफ समझनेजोग ऐ। इस मौके पर बोलदे होई मुखमंत्री होरें अग्गे आखेआ।

MoS PM

केंद्री मंत्री डॉ. जितेंद्र सिंह होरें आखेआ ऐ जे प्रधानमंत्री नरेंद्र मोदी निजी तौरा पर किश्तवाड़ च बचाs ते राहत कम्में दी दिक्ख-रिक्ख करा'रदे न। जितेंद्र सिंह होरें आखेआ जे घटना दे पैहले गै दिन प्रधानमंत्री होरें इक समीक्षा बैठक कीती ते शुक्रबारै गी उनें स्थिति दा लगातार जायजा लैता ते विस्तृत जानकारी लैने आसतै उपराज्यपाल ते मुखमंत्री हुंदे कन्नै चर्चा कीती। केंद्री मंत्री नै एह गल्ल जंदे रोज जम्मू च इक संवाददाता सम्मेलन दरान आक्खी। उनें आखेआ जे सब्बै सरकारी मैहकमें नेड़में तालमेल कन्नै कम्म करा'रदे न। सेना, बी.एस.एफ, सी.आर.पी.एफ ते होर कई केंद्री बल सक्रिय रूप कन्नै हिस्सा लै'रदे न। सीमा शिड़क संगठन चला'रदे बचाsउ

कम्मं च मदद आस्तै मलबा हटा'रदा ऐ। उन्नै एहू बी आखेआ जे पीड़ितें गी लोड़च्चा मुआवजा दिता जाहग।

<><><><><><>

Health Services Chasoti

किश्तवाड़ दे चिशौती इलाके च बदल फट्टने दी क्रोपी दे बाद, सेहत सेवाएं सरबन्धी निदेशालय जम्मू दी इक टीम नै डाक्टर अब्दुल हमीद ज़रगर हुं'दी अगुवाई च चिशौती च एमरजेन्सी मेडिकल प्रतिक्रिया उपास शुरू कीते न। एहूदे अलावा डाक्टरें ते नीम डॉक्टरी अमले आहिलयां केई मेडिकल टीमां चिशौती च हर रोज 24 घंटे अपनियां सेवां देआ करदि'आं न। सब्भनै सुविधाएं कन्नै लैस एम्बूलेंसां, सेहत सेवाएं दी तुरत दस्तयाबी जकीनी बनास करदि'आं न। कुदरती क्रोपी दी मारै हेठ आए दे इलाकें दे नेड़े दोआइएँ ते इलाज-मुआलजे मतल्लक दिक्खभाल आहले एमरजेन्सी मेडिकल कैंप स्थापित कीते गेदे न। सेहत मैहकमे आसेआ किश्तवाड़ दे जिला इंतजामिया सने SDRF ते NDRF दे नेड़मे तालमेल कन्नै कम्म कीता जा'रदा ऐ। किश्तवाड़ दे मुख मेडिकल अधिकारी डाक्टर रजिंदर होर इस गल्लै गी जकीनी बना करदे न जे सब्भनै लोड़मंदें गी बेल्ले सिर मेडिकल दिक्खभाल दी सुविधा पक्क गै हासल होऐ।

<><><><><><>

PTC-Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बशकार ऐ ते ओह जम्मू जिले दा रौहने आहला ऐ, ओह जम्मू जिले दा रौहने आहला ऐ एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोइचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंघत लोइचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोइचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 31 अगस्त 2025 संजा 6 बजे कोला पैहले-पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>

AIIMS-Jmu

अखिल भारती आयुर्विज्ञान संस्थान-एम्स जम्मू नै राश्ट्री सतह पर आउटलुक मैगजीन दी 2025 बरे आहली सरकारी मेडिकल युनिवर्सिटि एं दी रैंकिंग च 7मीं थाहर हासल कीती ऐ। एम्स दिल्ली च 6मीं थाहरै पर ऐ। 1 जहार चा 910 अशारिया 2-2 दा स्कोर हासल करियै एम्स जम्मू शिक्षा, शोध, बुनियदी ढांचे ते प्रशासन दे स्हाबें उत्कृष्ट पाया गेआ ऐ। इत्थे अजें तगर 2 लख 60 जहार मरीजें दा Out patients दे तौर पर इलाज कीता गेआ ऐ ते 1 जहार 800 आपरेशन कीते गे न। एम्स जम्मू च ट्रांसप्लूजन मेडिसिन यूनिट ते इक अतिआधुनिक

Genomics केंद्र बी मौजूद ऐ। एम्स जम्मू दे कार्यकारी निदेशक डॉ. शक्ति कुमार गुप्ता होरें
इस सफलता दा श्रेय दूरदर्शी नेतृत्व ते राश्ट्री सेहत सरबन्धी पहलकदमिं गी दिता ऐ।

<><><><><><>

Army Duggan

भारती सेना नै कठुआ जिले दे डुग्गन ग्रांs दे इक परोआर आस्तै इक नमी मेद आहन्नी ऐ।
फौज नै इस ग्रांs दे 8 बरें दे अक्षय शर्मा गी कई बरें दी खामोशी दे परैंत ओहदी अवाज
वापस दोआने च मदाद कीती ऐ की जे अक्षय जन्म शा गै बोली नेई सकदा हा। अक्षय दा त्रै
बरें दी उम्री च इक आपरेशन बी होआ हा पर फी बी ओह बोल्ली नेई सकेया। अक्षय ते ओहदे
परोआर दी इस संघर्ष गाथा गी दिक्खियै सेना दे इक डाक्टर नै आपूं स्पीच थैरेपी दी सिखलाई
लैती ते फी अक्षय कन्नै इस माध्यम कन्नै कम्म शुरू कीता। म्हीनें दी ट्रेनिंग दे परैंत अक्षय
नै बोलना शुरू करी दिता जेदे कन्नै ओहदे माऊ-बब्बै गी इक बड़ी बड़्डी राहत थोई। एह दिलै
गी छूने आहली कहानी दस्सदी ऐ जे कियों फौज नां छड़ा बन्नै दी फहाजत करदी ऐ बल्के दूर-
दरेडे इलाकें दे समुदायें गी मदाद बी पुजांदी ऐ। आकाशवाणी समाचार कन्नै गल्ल करदे होई
अक्षय दे पिता होरें आखेआ।

<><><><><><>

Kathua-Cloudburst

हूनै-हूनै थोई दी जानकारी मूजब कठुआ जिले दे कई इलाकें च ल्हास-पस्सियां पौने करी 4
लोकें दी मौत होई गेई ऐ ते कई लोक जखमी होई गे न। मुखमंत्री उमर अब्दुल्ला होरें इस

घटना पर दुख ते बसोस प्रगट कीता ऐ। उनें प्रशासन गी निर्देश दिते न जे ओह फौरी तौरा पर राहत ते बचा कम्म शुरू करन ते उथे फंसे दे लोकें गी मदाद उपलब्ध करोआई जा।

<><><><><><>

Weather

मौसम विभाग नै अज्जै थमां 19 अगस्त तोड़ी भारी बरखें दा अलर्ट जारी करदे होई जम्मू डिविजन दियें केइयें थाहरें जियां जम्मू, रियासी, उधमपुर, राजौरी, पुंछ, साम्बा ते कठुआ सनें होरनें थाहरें हौली थमां मध्यम दर्जे दी बरखा पौने दी पेशगोई कीती गई ऐ। डोडा, किश्तवाड़, रामबन ते कश्मीर दे केइयें हिस्सें च तेज हवा चलने ते भारी बरखा पौने दा खदशा ऐ। पहाड़ी इलाकें च बददल फटने, हाड़ औने, पस्सियां पौने ते पत्थर डिगने दा खतरा बने दा ऐ। लोकें गी दरेयाएं-नालें थमां शिंडे रौहने दी सलाह दिती गई ऐ। सैलानी ते यात्रु सोची-वचारियें अपनी यात्रा दी योजना बनान।

<><><><><><>